

文山集

文

山

水

宋丞相文山先生全集卷之九

行實

先君子革齋先生事實

先君子諱儀字士表生嘉定乙亥八月二十四日寶祐丙辰五月二十八日歿于京次年九月九日封于鄉之佛原嗚呼天乎仁者壽有德者祿先君子乃止是邪不肖孤上累先君子久于旅飲膳醫藥失節用速禍非天實不德有惡子至此釁戾丘淵身百莫贖柴骨爨心不自意偷視息至今日得黽勉畝大事猶瀝血苦塊以字先德嗚呼尚忍言之先君子嘗考次譜系文氏繇成都徙吉五世祖炳然



居永和鎮高祖正中繇永和徙富川曾祖利民妣郭氏祖
 安世妣劉氏考時用妣鄒氏繼母劉氏世有吉德鄉以君
 子長者稱一是方寸留耕于子子孫孫先君子嘗言滯學
 守固化學來新一革字志韋佩人皆稱革齋性愛竹依
 竹闢一室傍竹居或稱竹居不肖孤聞之諸父先君子幼
 穎慧器質端重進止如有尺寸書經目輒曉大義越時舉
 全文不一遺見鄉曲前輩必肅容請益暨長天才逸發志
 聞道嗜書如飴終日忘飲殮夜擊燈密室至丙丁或達旦
 黎明挾冊簷立認蠅字不敢抗聲愕寐者人雖苦之甘焉
 蓄書山如經史十集皆手自標序無一紊朱黃勘點纖屑

促密靡不到至天
地理醫卜等書游驚殆徧手錄積帙
以百揮汗呵凍弗斲鉤引貫穿舉大包小各有條間質難
疑剖析響應某事出某書某卷且指數以對爲文發持滿
無不的中機軸必已出命意時娓娓談他事若莽於尋繹
一援筆雲行水流無凝滯中年文氣益老拾汗漫歸諸約
不峭峭刺目有溫醇渾厚之風焉閒居侃侃春意溢出顏
面蚤事祖盡敬祖母優游暮齒視藥膳卧興扶持華髮鍾
愛父嚴母慈侍夙夜省燠寒一出忱意不視顏色爲肅愉
事繼母篤至始終無纖芥間一家氣象藹如和風鄉黨稱
孝於宗族厚待季父削藩町悲忻同情季父歿不幸子病

廢經紀其家撫幼姪等已子疏從遺孤振翼之俾蒙于成
闕居居無居者歲時衣粒各有節度嘗謂宗族一本誼不
得不恤愛范文正公義田記規模次第曰吾得志當放此
行之親媼孤貧者哀矜勞苦撫字無遺力喪不克理辦之
棺至已所服用捐以歛雖在䟽末次序情文各惟其稱與
人交好大躰不爲細家迫速戶外屨日滿絕甘分少無䟽
密皆被和氣交誼天至聞貧困患難赴急如不及忱意感
人有臨終握手郗歔流涕託之以孤者歲大比凡與大夫
待博士選者皆有約首誼綿數科間不能與自捐貲籍其
名暨充賦就奉爲助約所不及以意告傾已有爲行資至

貸以應詎聲錚然對人氣語和易鄙夫窶人亦曲加體接
無一失聲氣去里有蹈非葵悉忠愛援誼聞陳聞者感動
見後進片善獎予不容口孜孜誘掖如子弟給餼數畝畊
者多不輸寧令負已不忍直于有司蒔園漁池相倣無一
償亦不較間嗤不武則曰彼貧且殆吾奈何攜之有竊負
其貲去既而困還不惟不加責恤其人終身將作室索木
齊垣時厲死多露骼惻然曰吾可無居人不可無歛匠棺
惠貧者歲賑饑隨所有不給至市粟以應顛連無告過日
輒怵惕隨力爲謀一日讀書至晏子敝車羸馬事愀然曰
使吾族吾親吾鄉人休休有餘至願也惜嗟再三家居門

蔭茂木暇日相羊芳陰間雅嗜茶煎瀹多手出時邀朋遊
文字語移日樂極浩歌縱奕視世間融融沄沄漠不介胸
次性凱樂惟恐拂人事經然諾雖不利於己不悔一言話
傾盡肺腑無留藏應酬一切任真事不可直濟或道以詭
御寧事不濟不爲耻已勝語及不平辭和氣舒無忤色有
以欺心至知其私不發且無章於人欺者多愧悔感泣人
皆嘆爲有德君子謂當於古人中求之誅者曰我公之德
言矩行規世智黃間我心坦夷市利血刃我範驅馳生平
所爲事皆可質鬼神而無疑嗚呼是得其槩矣始天祥兄
初且長先君子不疾其不令昭蘇蒙滯納之義方日授

晝痛策礪夜呼近燈誦日課誦竟旁摘曲詰使不早恬以
習于弗懈小失眠即示顏色雖盛寒暑不縱檢束天祥兄
弟慄慄擎槃水無敢色于偷自此名師端友招聘仍年至
時先疇給費久之室罄力弗逮廼率天祥兄弟歲脩于竹
居陳所裒籤軸俾挾精剔華鈎索遐奧董綱要竟日夕弗
倦雖貧浩然自怡有未見書輒質衣以市得書注意鑽研
又以授天祥俾轉教諸弟繇是程督益峻書警語徧窓壁
如三尺在目見爲文章撥斲正氣輒不憚必維以法度天
祥兄弟奉嚴訓蚤暮侍膝下唯諾怡愉不翅師友或書聲
吾伊或歛襟各靜坐潛諷或掩卷相與戚嗟人情世道此

文山全集 卷之九
時氣象父母俱存兄弟無故天下之樂莫加焉歲乙卯天
祥璧俱叨與計偕時仲弟靈孫年十有六未試墨于窓曰
出師未捷身先死長使英雄淚滿襟竟以疾先撤棘一月
卒先君子及是擊涕竚貽悒悒痛悼天祥璧將進禮部欲
董于征顧先君子哭子方新天祥璧復去左右恐益重哀
出可寬襟抱且旦夕定省得不缺不敢辭以膈月望行次
年天祥璧俱僥倖奏名夏五戊戌廷對踰挾先君子病暑
投涼劑立甦方徙一靜室規便攝理甲寅集英賜第天祥
以不肖冒首唱歸拜寓館移時之期集所越一日聞疾復
覆告于朝不俟命亟去侍藥省劄下玉音給假三日時先

君子雖病神色不改視眛者聚伺變候僉曰無虞戊午向
申忽病革進藥卻弗服曰度吾不能起此疾汝兄弟勉之
天祥壁震怖號慟請命于天祈促齡壽親筭不獲命椎心
禱呼冀殞滅以代又不獲命入夜寂然而逝嗚呼痛哉嗚
呼痛哉厥明畿漕聞于朝朝命官吏來治喪事六月庚申
朔天祥壁奉柩出國門裊歸鄉士庶人無不失聲痛嗟路
祭巷哭以返于先廬時七月癸丑也嗚呼先君子一至此
邪不肖孤二十有一載弟方冠且髻承顏菽水歲月幾何
天乎不使終養而感之于中身邪慘焉逆旅睇親舍越在
二千里外天乎不使終于正寢而忍至於客歛邪往時征

衣拜堂上舉觴飲餞親賓祖道外期嚮何許天乎遂以是
爲未訣邪天祥璧奉貢剡時先君子已哀仲弟不見孰謂
方階祿金先君子纔見而禍遄作天乎天祥璧何以竊第
爲邪嗚呼不肖孤事先君子不孝奉起居無狀有疾病而
闇不知不能積忱衷臆倉卒無以動天聽罪生不贖背血
被面摧決肝胸顛頓躑躅裁以必死顧屬續一語忍痛受
命不敢不勉恐無以祇訓于前人以忝盛德廼相宅兆筮
曰吉排土濡涕墳以竣役將奉躰魄安馬嗚呼渺音容隔
幽陰終天而止矣先君子妃曾氏今男三人天祥璧璋女
三人懿孫淑孫順孫遺墨有寶藏三十卷隨意錄二十卷

痛惟先君子利澤不施于人名聲不昭于時匪石遺德恐
久遂沈泯天祥不揆不孝裒錄事實沈痛刺骨荒忽慙愧
世有大手筆能表章幽潛光照于無窮稽首百拜以請

知潮州寺丞東巖先生洪公行狀

東巖先生洪公蓋陽巖先生文毅公族諸弟也文毅公以
孤忠遺直著聞當世其平生言論風旨講切上下公未嘗
不在其間文毅公屢召不赴公浸嚮用輒落落不合去時
論稱爲二洪文毅公旣沒泉南文獻之望盡屬公識者謂
文毅公未爲者將有爲也而公又不及大用以死天之生
才倏忽代謝安得不深慨於此叙次行事論諸方來門人

之責奚以辭公諱天驥字逸仲自號東巖世晉江縣人嘉
 定戊辰七月庚戌公以生生有異質沈靜專一自少講求
 微言通念曉析乃已故於經史諸子百家之辭無不貫串
 文章自成一家以紹定改元薦于鄉名聲振一時學子踏
 門願求模楷者日衆公坦明夷粹專以宿於道為教遠事
 王太母一夕疾甚殆公不解帶不交睫至剔股肉雜湯藥
 進公一念之切通于神明然終身不以語人登淳祐七年
 進士第初筮邵武軍建寧縣尉發擿姦伏當官無所回撓
 時有劫寇王若曾嘯聚千餘人騷動兩路諸所委捕多畏
 沮公奮不顧身提兵擣其巢一舉空之偽造成風駕楮幣

蠹公密設方略動中肯綮李若聶凡三大黨與無不各就
縛難獮之石壁胡公頴秋崖方公岳交章以公善狀聞于
朝十二年循從政郎調連州推官未上寶祐改元旨差監
惠民南局四年較藝南宮公考鏡詳密精力不間晝夕所
賞拔士多根柢理致當時號明有司公雖沒近周行然無
所附麗恂恂侃侃望之山立徐公清叟吳公燧馬公光祖
顏公頤仲俱剡上其能將用矣會有言者徒步西歸泊如
也六年淮閩擇士自從首辟致公爲屬景定二年通班授
宣教郎知廣州香山縣至之日以教養人才爲第一義脩
復大成殿明倫有堂主敬美身賓賢登俊有齋皆捐俸入

爲之歛不及民其爲政一裁於義俗譁健戢其尤桀黠者
曰此囚牙訟師去則吾民妥矣邑以大治洪公勲趙公汝
暨雷公宜中及倉憲交以邑最上咸淳元年轉奉議郎二
年差監行在權貨務都都茶場四年吳公革馮公慶得趙
公順孫劉公敞皆以吏才爲薦差監都進奏院轉朝奉郎
馮公時爲刑侍及戶侍劉公應龍交委以書擬本部文字
公皆樂爲知己盡于時上即位逾年初政新美公輪當陛
對宿齋豫戒異積忱意悟上心取虞廷君臣時幾之說寓
規焉其一曰君心勤怠之幾二曰人心離合之幾三曰君
子小人消長之幾四曰中國外夷強弱之幾及朱文公天

理人欲之辨首尾二千餘言其辭諄復懇切深刺膺髓玉
音嘆美又言泉有屯戍左翼一軍乏興之害米舟搜糴生
變之虞而朝廷籍沒翁林二氏之田可歲得穀萬斛以紓
戍卒兩月廩食或有不濟寺院及單丁住持令本州覈實
區處併撥爲軍餉之助餉足則糴寬糴寬則米通民永無
貴糴患矣朝論翕然以爲論事有陽巖風除大理寺簿五
年轉朝散郎知潮州公之在潮也視民事如家視敝政如
已疾捐金以裕學廩傾困以粟饑民梁川以利病涉知無
不爲爲無不盡潮與漳汀接壤盜寇輦民郡聚剽劫累政
以州兵單弱山徑多蹊不能討公應變設奇降者相屬又

欲於接境置屯多者三百人少者二百人掎角爲援郡爲
創搏節庫以贍之具有條畫悉以言于朝并下之漳汀放
此且嚴保伍之令以澄其源大抵公智慮深達如宿將持
重而規畫綿絡不以鄰爲壑也又潮有護田舊堤多嚙於
水馳俸與民築石爲堤民號之曰洪公堤且刻賦頌其旁
曰此我公東巖生佛所爲也去之日垂髻戴白者擁車下
不忍去公雅意林壑至是則曰吾可優游樂吾真矣九年
得旨主管華州雲臺觀公時益暢於詩數與嫺族觴詠從
從容而學徒有志於考德問業者多授以外聲利及終身
受用之要暇日登臨徜徉愛南安之間風氣明秀取所謂

小陂山者曰樂哉斯丘我死則塋焉預飭美楨治壽藏澹
然塵外蟬蛻之意十年正月公始屬微疾即乞以本官生
前致仕八日忽索水自浴衣冠休于正寢脩然而逝嗚呼
若公者可謂啓手足而不亂其風流篤厚真足以追配文
毅公於九原而無忤者矣某於公之門實丙辰省屋諸生
戊辰之春待罪中朝諗日拜公床下矣未及而去國然於
公之踐脩出處之槩蓋心識之共惟穆陵豐芑菁莪之澤
涵育天下天下士蝟然勃興溫陵邈在海隅人物相望陽
巖之氣節煥發乎其前東巖之抱負翼承乎其後使二公
誠得盡展拓又未知孰後孰前也嗚呼今復見斯人哉曾

祖遇妣陳祖德明妣李父伯道贈宣教郎妣陳贈安人元
妃陳先二十六年卒贈安人繼趙封安人先三年卒子男
應午應申應壽俱業進士女四適胡登龍丘公賜王毓奇
一尚幼應午力學克肖收拾公遺稿若干卷曰東巖集藏
于家將以是年十月己未奉治命以塋趙安人附殯應午
千里貽書俾某狀行姑序其本末以俟立言之君子謹狀

墓誌銘

知韶州劉容齋墓誌銘

咸淳四年四月十二日容齋先生劉公元剛卒于家年八
十有二先生官至郡守死之日幾無以爲斂附於身者稱

家之有無鄉黨之士莫不高先生之風而哀其志焉其邑
子文天祥與人言欬歔慷慨重懼前輩言行久遠沈湮無
以訓來者會其子昌孫以先生狀來請銘某雖不敏其可
以辭先生字南夫一字南強世爲吉州吉水縣人治毛氏
詩早爲鄉校知名士嘉定十年入太學後六年登進士第
授迪功郎信州永豐縣主簿陞從政郎調靜江軍節度推
官丁外艱服除差江州教授兼濂溪書院山長自故丞相
董公槐今丞相江公萬里以下舉親民五員淳祐五年班
見以通直郎知撫州崇仁縣縣政以理民以佛子爲謠先
生奉母夫人在官間日與其弟自提板輿相羊爲娛邑人

化之以憂去十年通判鄂州以磨勘轉奉議郎承議郎董
承相當國入爲左藏東庫時將薦先生試館職會董丞相
去不果初東庫日進會子紙若干丁丞相以趣辦爲才風
有司頓增十萬先生以職力爭忤其意展磨勘兩年出爲
泰州添差通判景定元年某月差知昭州皇上登極轉朝
奉郎適郡當次稱疾不果行旨差主管建昌軍仙都觀居
二年再任自江上平凡權奸用事所擯斥朝廷獎拔殆盡
時論以先生爲屈未幾詔還磨勘月日駸駸向用而先生
前一月逝矣嗚呼豈非命邪早刻意詞科書無不讀其餘
佛老精言亦各深到平生居官所至清謹家無餘貲蕭然

環堵四方學者執經問字相繼于門先生誘掖懇懇不啻
父兄之遇子弟尤工爲文章雖遊戲之筆鮮不竒古江湖
之士得品題一語足自表於其徒與人盡恭應接終日無
倦意客至雅言之外談玄演空聞者徃徃忘去世人以聲
利爲門戶先生惡之如惡臭登第垂五十年郡縣官吏
知敬先生不見其可畏出入不設車徒間步行井陌中不
以爲苦甘心屢空以至死而不悔噫此真所謂善人長者
矣曾祖致道妣周氏祖圭妣李氏考次朔累贈至奉直大
夫妣陳氏熊氏俱贈恭人妣涂氏先十六年卒贈安人子
男三人昌孫其長也次信孫愚孫皆蚤世女長天次適太

文山全集 卷之九
學生陳應發又次適進士胡淵孫男一人洵武女一人許
適龍氏以某月某日塋某縣某鄉某里之原遺墨有詩書
孝經論語孟子演義若干卷詞科類稿若干卷容齋雜著
若干卷家庭謾錄若干卷任左藏日以孝經論語孟子演
義上進有旨降付資善堂銘曰 文彪彪德恂恂貴如單
門死如齊民約而家豐而身我作銘詩永懷古人

義陽逸叟曾公墓誌銘

公諱珪字天錫號義陽逸叟天祥外王父也天祥不肖賴
公教誨由記事以來周旋三十年於公無所不知蓋至於
其處死生之變然後知他日觀公者未盡而公誠有大過

人者焉嗚呼異哉公性穎悟志不樂凡近讀書百家雖涉
獵靡不通達所自得往往於佛老氏其見之暇行敬恭神
天一言動不輕口不御肉月常十四五對人敷闡玄寂四
座輒悚然傾聽最後遇異人與語幾欲棄人間事求長生
之術年踰六十始聞正學恍然自失死生之說鬼神之情
狀講探幽眇頓改吾意既卧疾服藥外無所問戒左右勿
以巫祝從事間祈禳厭勝揜公不知公覺輒撫床怒呼病
且久骨立如束聲吐精爽不變異猶足支歲月一日召天
祥至公乃鈎稽卜筮指諸掌曰今日老夫當訣故令爾來
時聞命震愕止公勿易言公曰吾豈不省事哉形神合則

爲人吾形憊久矣今腰足如斷心火益燥神且游散居常
謂不識死死則如是又曰始吾崇信異說今且死日中無
怪見顧二子今必不爲佛事周身一切雖絲縷亦公所處
分殯宮哭位與凡喪塋祭具有成說天祥弟壁任京府尹
椽公口授數十言今爲書遺之強起字紙尾句讀筆畫曾
不顛錯集諸孫各付謹飭語令羅拜床下辭去衆泣漸揚
公曰死生如晝夜不足多憾麾止之索酒飲之三連三言
曰吾真去矣聲脫口而逝嗚呼陰陽魂魄升降飛揚氣之
適至雖夢寐莫適爲主公幽明隔呼吸而從容若此世能
言死者不少此非嘗試事臆度料想靡所依據公去來一

息實天祥所親見道之粲然莫此深切嗚呼異哉嗚呼異哉公事父母孝待族姍以厚與人交久要不忘僮尚義不事生產作業惻隱貧困能推食解衣議論剛正好面折人不藏怒宿怨有古君子之風焉公有子有孫早授家政天祥既奉偏慈迎公就養居數年甚適間出徐步幅巾野服人羨其優游公亦論文賦詩圍棋命酒自謂天壤間陶陶人也得疾於景定辛酉二月九日始復正寢歿之日壬戌二月癸丑得年七十有二曾氏世家盱江徙吉之泰和梅溪族號長者曾祖邦寧祖知和考昌權妃張氏先公十九年卒子二棐榘女四適錢光延康師顏于天秩其仲天

祥母也孫男六端孺淳孺文孺俊孺良孺明孺女一適郭
泳曾孫甫申以次年九月丙午塋吉水縣永昌鄉藥陂之
原成公志也初公先世重卜塋塋師講張爲幻封鬣無定
居公憮然曰吾詎忍吾先至此吾不可向求之乎乃從兄
瑾載資越竟旁叅博扣逾卜年得其說以歸由是高曾而
下一奠不再徙公對塋師言嘗斷斷不可不售不傳故秘
莫得聞焉公命未革命天祥曰老夫一日不起無潛德傳
世記歲月非爾其誰屬臨終申其詞再三天祥泣不敢當
重念靖節作孟長史傳東坡書程公逸事往蹟漫滅猶勤
追述矧公面命惡得辭顧方繫官于朝不獲哭拜填祖營

視丘窆南望歛歛輒紀家世行實而表其死生大事爲誌
并爲銘銘曰 維二氏之蔽於死生兮小其用於一身一
陷溺而忘返兮鮮不惑於恠神公日昃之離兮羗出駁而
入純微臨絕之琅琅兮公幾混於常人朝聞而夕死兮何
憾乎幽冥藥陂之鬱鬱兮遺躅之所經存而以爲志兮歿
將以爲寧旣固旣安以利嗣人兮萬古萬古如斯銘

羅融齋墓誌銘

廬陵有隱君曰融齋羅公嗚呼可謂有德人矣予嘗詣公
入其門肅肅如也僮僕訢訢如也公出雍雍如也坐申申
如也語愉愉如也予聞公燕居之槩晨起盥櫛畢正衣冠

堂中就胡床坐不惰不倚儼然終日雖盛寒暑以爲常不
好狎不侵侮無易由言對賓客賓客或不自持左右置司
馬公家訓一通保家擇婦常自以爲名宦中無敢疾呼
女隸無敢近几席執事左右唯諾無敢滌唾諸子無敢晏
起早卧聞公攬衣警欬就學惟恐後夜至公所各以所業
次第誦說獎掖磨厲交發互出凜然義方之意由是吾里
之言家法與善教子者皆曰羅公羅公云公生而穎發五
歲即篤志強記容止如成人既長嗜書忘寢食爲文不事
鈎巧惟意所到自然成章學書入楷得蔡氏風度蚤有意
場屋四詣京師試諸生晚年始以此事付兒輩然公所爲

強學者雖老且病不衰也公未弱冠而孤經紀門戶即不爲細家迫速先世積逋券如疊一日悉畀炎火曰是先人所親厚其一切勿問聞者義其勇宗族親黨孤子者貧乏者或給之田或予之金終其身恩意浹至外內無間言四履滿戶外設榻無虛日推食解衣至者無不得分願而去歲青黃不接會其閭里輟時直幾半隆寒給散有差環公之境無以饑告鄉鄰有難畢力排解幾微不見顏面不摘扶人過有負公者未嘗示以聲色其人久之自愧悔有愧悔且死而恤其妻子益恩者與人語傾盡肺腑已諾必誠不以利害爲二三其忠信如此戒庖廚勿殺凡登諸俎者

悉自外致有生饋禽魚必解放之其仁厚如此自奉不逮
中人衣服十有餘年不改亦不煩澣濯其儉素如此里之
稱公無大小必曰君子長者有不善相戒勿爲公所知嗚
呼真可謂有德人矣公之中身諸子各拔穎而起其一兩
名薦書登開慶元年第調臨江軍清江縣主簿公時敕簿
君曰汝爲庶吏即不辱吾子簿素脩謹聞訓益厲有名聲
於時生母蕭氏以上壽錫封孺人諸孫競秀長幼五葉人
世樂事畢赴一門天之扶持吉凶悔吝先定如著龜以公
平生孰不可書獨嚴重整肅能使人鄙慢消去福德莫盛
於此昔伊川見人靜坐輒嘆其善學徐節孝因安定頭容

直一語自此不敢有邪心使公得二先生爲之依歸因其
資以至於道所成其可限量乎哉公諱士友字熹善一字
晋卿融齋所自號景定元年該明堂恩告授承務郎致仕
咸淳二年二月十四日終于正寢年六十有八遺文有史
編十卷諸家詩躰十五卷羅氏由金陵徙吉之吉水五世
祖居廬陵之新安曾祖暉祖時英考莘老妣孫氏趙氏妃
蕭氏封孺人子男五人濬煜植畊壘畊簿君也再調贛州
濂溪書院山長女一人汝順適今文林郎新廣南東路提
點刑獄司幹辦公事周壽申先公卒孫男十人女六人曾
孫男二人女一人俱幼十以四年某月某日歸于順化鄉

文獻全集 卷之九
三陂周家山之原其孤前期請銘於予予視公夫人行也
公之子於予同充賦於予弟壁同年進士予之任江西臬
事也以公子上之公車通家孰先焉矧公行誼著於鄉則
所欲稱美而論撰之者豈獨孝子慈孫之心哉銘曰 不
言躬行萬石君教子義方竇禹鈞行其庭不見其人雖無
老成人尚有典刑

封孺人羅母墓誌銘

迺咸淳九年廬陵融齋居士羅氏生母滿百歲融齋之夫
人時年七十六白髮在堂事百歲母如婦禮子孫孫子環
侍起居爲男女三十有奇予鄉稱慶門必曰新安羅氏其

年二月朔予從里中士奉幣載酒拜百歲母堂上母荅拜
諸孫皆拜飲母母醕酢賓諸孫各執從既成禮夫人視予
年家子不聽去爲之留三日爲詩以歌其事好事者或爲
圖以傳國家承平休養生息用康于人眉壽無有害傳曰
豐水有芑數世之仁也夏予將指于湘未數月聞夫人計
歛歔失聲問百歲母安乎曰安母于今蓋百踰一矣夫人
將塋其孤以是母命來請銘予後母生六十三年得載筆
承命銘夫人自昔能言所未有廼叙次其凡繫之辭夫人
姓蕭氏吉水人曾祖琢祖曾父異鄉貢進士妣廖氏繼張
氏徐氏歸承務郎致仕士友是爲融齋居士先七年卒子

男五濬先五年卒煜植畊脩職郎前監而在奉口酒庫屋
女一適儒林郎侍班周壽申先二十九年卒孫男九宋寓
宦寔寓宜紹顥平女十一長適張棟曾孫男七舉孫頴孫
元孫滿孫怡孫真孫復孫女二夫人以庚申明禮恩封孺
人卒之年七月十日次年十二月某日封于所居里柘逕
之原銘曰 昔唐夫人之爲崔母兮逮事長孫皇姑兮姑
年高齒落以枯兮升堂乳之劬劬兮姑曰婦恩之不可孤
兮願世世子孫之不渝兮夫人五世崔如兮母年踰百崔
所無兮胡不與壽爲徒兮爲此毋慙兮爲夫人吁兮

鄒月近墓誌銘

廬陵南方之上游支水自贛興國而下曰富川鄒氏族焉
鄒故出范陽五季始有籍斯土有昶者富而禮瀘溪王公
平園周公誠齋楊公良齋謝公皆與之游川流在門能不
愛重貲疊石爲屋以脫往來於尼周公記之一時稱爲長
者其歿也文敏洪公銘其墓鄒氏福祿方來而未艾長者
之所種植也昶生將仕郎時飛嘗伏闕上裕民十策時飛
生大淵大淵生澹是爲月近君月近云者君以名亭而鄉
人因之以爲號也君蚤孤母張氏勤儉自樹立紹定辛卯
該東朝恩以壽封安人君於其時奉親愉愉無子弟之失
張氏歿始經紀家事循循如不勝衣人不見其聲色而充

盈裕大之福自然日進而不止族黨之不自給者親戚之
無所歸者朋友之遠役而不能行者君意性所到皆能隨
事爲義若夫脩浮梁甃通達歲發廩以倡賑荒守望有警
則裒丁以耀于衆皆義之凡也俯仰三十年矣君於其間
無鄉曲之過居性最緩或以佩弦進曰吾豈不知出此吾
所見叫呼號呶自取僨敗者衆吾誠緩不失事盖老而益
審焉然君終身無惡名變容動色之警不及乎其門優游
和平永保終吉嗚呼真可謂長者孫矣君字次清登仕郎
生嘉定元年六月丁酉歿咸淳元年九月己未配吳氏迪
功郎江州司戶叅軍懋之女子三文孫振孫俱登仕郎癸

孫幼卜以四年正月葬于順化鄉新安社之原其孤前期以奉議郎劉君惠祖狀來乞銘劉君戚也聞而知之予君鄰也見而知之敢無以銘銘曰長者之澤子孫賴之去之百年有以似之天於善人曷不壽之善人有後天將與之

鄒仲翔墓誌銘

景定五年予奉親高安除提點江西刑獄謝弗拜適寇起興國之東廬陵犬牙相錯所在騷動余所居鄉一闕千室大家以去爲望鄒君仲翔中人之金也率鄉人柵東門山爲備山下阻衣帶水君恐倉卒涉者爲魚梁浮梁以濟明年春寇一日蓐食行三百里薄太和之王山距余鄉半舍

文山全集 卷之九
而近鄉人扶携老稚走險微一不善脫君經紀山寨當是
時一鄉之命懸於君訖寇去君保護無有害時余避節弗
獲命會樞密督以捕逐文移旁午余以鄉部嫌將重以請
慨然曰奈何以我辭受坐視龍蛇爲赤子困乎於是即日
受印下令會兵諸山寨皆署長君與焉未幾寇平余罷歸
里于溪之上游斬荆莽燔榴鬻得竒觀焉君次然從予山
中匹馬一童朝至而暮忘歸率以爲常余每集賓從君輒
在其間聞余語中理解未嘗不解頤間從余言人生何爲
碌碌棄家事從公游可乎余謝非余所知君曰吾意決矣
乃盡以伏臘屬其子而頽然以休訪予南北厓某水某丘

若將終身焉癸酉夏四月余行湘君送余於香城後一月
君以疾死余聞之歔歔不自禁湘之歸也未及門望見其
子來哽不能言嗚呼余豈私君君與人必以情聞義輒赴
見有不善面折不少回而不蔽怒不宿怨曠如也君雖赤
手起家而好施出其性歲饑發粟給其比鄰二百戶能捐
殖以自損道太和甃十里道廬陵甃六十里衣寒者食饑
者病者饋藥死者予棺喪無歸者葬其土度其能爲輒不
少吝君之族前有長者以善植門爲益國周文忠公所知
去之百年風流相接焉余嘗謂君慈而樂舍大率浮屠家
所尚至臨難急病能禦灾捍患以有德於鄉閭大夫士或

愧之君名鳳仲翔其字世爲富川人曾祖大明祖人傑考
世興妣梁氏娶蕭氏梁氏皆先卒子男一人曰成女三人
適郭鏐王鎔劉鋒孫男二人夢龍復生君得年六十有四
以甲戌十一月某日塋于其鄉沙洲平之原治命也君之
先人嘗卜地于東門山之下曰吾父塋于是泝山而上爲
龍頭得一丘焉曰吾歲骨焉吾後其興乎君晚而優游有
子治生有孫業于學咸以爲驗銘曰 東門之原君之父
兮東門之麓君之母兮東門之巔君所構兮瞻彼東門相
爾後兮

樂庵老人劉氏墓誌銘

余讀漢陸賈傳甚羨余鄰翁樂庵劉氏賈擇田地家好時
出橐中千金析其五男安居過之數擊鮮十日而更以壽
終余嘗謂人生晚福優游宜莫如賈當是時韓彭俎醢鄼
侯周勃猶不免械繫求爲買一日得乎翁生四子皆有才
智四十年即棄家政就養諸子以次第循環五日一更其
設饌務爲相高惟恐不得其歡心翁饑來得食渴來得飲
早眠晏起一切不顧人間事惟時時接方外士講鉛汞之
術問取松柏惟意咀啖翁年過七十而顏色如童攝生有
助焉或謂陸生作新語爲漢達官非翁匹余曰不然賈艱
難羸項間從馬上公爲客一再使越崎嶇萬里翁生於世

長於世老於世不出鄉終其天年有樂於其身無憂於其
心設賈復生校翁失得未必以彼易此翁又有數事異甚
里傳鬼車鳴者未夜相戒滅明屏息戶內翁開樓大呼願
見鬼車卒無有有神以禍福驚人翁過其祠持牛炙如常
人莫不危恐翁休休如也嘗有所營造忌某星直某方翁
曰犯者殆乎請身當之某星迄不驗爲子納婦或云婦不
利於長翁不爲奪自是諸昏嫁曆家說格不用中年卧疾
家人私召女巫謀爲厭勝翁廉知之強起逐之出門未屬
續翁默自念作其像贊若辭而遠遊者顧左右曰吾死勿
事緇黃吾志也醫以藥進麾使去問日入乎曰然反面而

逝江南之俗尚鬼其人畏死而信巫翁能自不惑非由耳
傳口授殆一至之性然也翁名邦美字才卿樂庵其自號
也始祖邳長沙人爲吉州刺史家西昌九洲後徙廬陵富
川三世曰德遠文煥子玉妣曾氏娶陳氏先三十七年卒
繼祁氏其子孫實蕃濟生機洪生桂槐植模深生朴柚鄉
貢進士浩生樞楫槐復生癸孫女二適于夢牛曹雷應孫
女五適鄒曹許曹羅一幼翁八歲喪母十六歲喪父移其
事父母事兄長終身歲時上丘塚拜祖禰率諸後生尚有
典刑翁富壽安逸推其一念孝友殆命物所知諸孫方將
以詩書大其門翁必爲人宗乎翁生慶元戊午二月庚午

歿咸淳癸酉正月丙辰後二年正月葬于淳化鄉鳧塘之
原余家距翁一垣翁年吾祖之下吾父之上諡翁有年數
矣深與余游且厚來請銘銘曰 其生也有涯其死也有
時爾世其昌匪我銘其誰

劉定伯墓誌銘

余東家詩人劉君定伯類晉宋間曠達自余辟山水南北
崖落然不可人意君時從予招或不約徑造至則善爲言
譚名理逢_蟲出意所左右辯者不可詰江山朝暮四時之變
嘲詠賞嘯興出物外常使人諷念不可忘嗜奕最入幽眇
乘起鶻落日不停瞬解剥摧擊其勢如風雨不可禦勝敗

不落一笑飲酒可一二斗酒酣浩歌聲振林木或接冠袒
裼旁若無人或鼻息雷鳴徑卧坐上君豪縱沛然以爲自
得當其樂時不知天之高地之下老之將至焉爾予前在
宣州君以詩來思致清邁恨不即投印綬從君烟霞之表
既歸君好日以怡詩日以張大於是蓋年五十三矣迺孟
夏二日過予極論當世事抑揚不少挫詰且報曰君痰厥
逝矣予駭亟視之不復可爲哭失聲狂三日不能止非予
爲然凡與君交者談君輒揮涕里之人不問倪旄嘆傷如
出一口噫可人在天地間鬼神所忌邪君長身五尺餘豎
壯耐寒暑鬚髮如漆性落魄不問家事家才三四口粗了

伏臘不爲求贏有錢輒不惜雞黍送客無虛日朋友有無相通急難於我乎赴平生於人無諾責鄉人有爲芥蒂君一語輒化有不善開譬之無以爲望和氣薰浹蒸然善鄰一歲半爲四方客主君者所至投轄惟恐亟去雖兒童僕厮無不誠愛君者君破崖岸削邊幅不爲拘拘子子至道理所在確然守之不變其執喪爲孝子按喪禮門內不入緇黃一子二姪命以先疇瓜分而三無贏縮薄厚子曰敢不共命姪曰敢固辭一家興仁興遜鄉曲相傳爲盛門非好德疇至是君始祖邾長沙人爲吉州長史家于西昌之九洲十世祖德遠徙廬陵富川君之三世曰文煥子玉邦

賢妣鄒氏娶張氏子男梓女淑容適彭天麟卜以次年咸
淳癸酉十一月壬辰封于淳化鄉扶竹坑楓樹塘之原君
名澄定伯字也自號前村有詩集自編曰前村初稿君詩
不爲深苦而清拔雄健如其爲人有子能力學不墜義方
君死何憾予所憾者君死獨何蚤泣而爲之銘銘曰 其
堅也驟折其勁也蚤摧命之滅凶匪繫其材生也達死也
何怛君墓我銘我心則結

王推官母仇氏墓誌銘

東廬王先生母垂堊命其門人文某銘噫某何以銘先生
之母之墓哉廼景定三禩進士策御前某以覆校待罪殿

廬一日初考官第一卷擬上一覽某稍細復之傳觀同官
驚訝得人會一字近廟中媿名某以才難白詳定官請所
以處臨軒之日賜出身乃吾東廬先生也嗚呼使先生以
名第取先天下歸拜母堂上斷機調熊庶幾夙昔乃累先
生以不釋乎此某其何以銘先生之母之墓哉雖然事孰
爲大事親爲大守孰爲大守身爲大使先生失身爲親憂
雖高科如之何先生雖不得高科爲臣忠爲子孝身在焉
親固榮也諗先生曰然銘無所辭銘曰母性仇氏世居廬
陵之白沙考諱彥誠生二十二年歸于贈迪功郎致政君
諱化權逮事姑兩世左右無違祭塋以禮相夫子貞調娛

中和靡失節度子始就學篝燈夜分督厲吟諷及負笈從
師端以上手自紉綴連寒暑彌不倦以子入大學甲寅明
禋封孺人從子赴永州戶曹祿養壽康稱其命服咸淳七
年三月十九日終于家年八十有三子二長大琮先孺人
一年卒次國望從政郎前袁州軍事推官女四一夭二適
李穆之三適蕭應祥四適劉起岩二與四先卒孫六男長
困餘未名五女長適劉煥次許彭麟餘幼九年三月壬申
厝于城西黃腹山之原

贈承事郎徐

咸淳九年夏六月壬午

史旌縣最也於是某不獲遂一節按部湖右親見衡山之
父老子弟歌思遺澤於湖湘波間皆曰徐公字
我民六年我父母之其敢忘及聞聖天子所以褒舉選表
又皆手額踴躍爲朝端賀爲天下賀某退以語客曰麟仲
信才且賢何以得此於邑之人去而不忘如此哉本則有
本水則有源若靈芝俄現醴泉滄出居然瑞世其鍾和乎
秀豈伊一夕之積蓋相與論其世可乎客曰徐氏居清江
於廬陵東西家御史君之考曰溪莊公溪莊公厚德人也
余聞而心識之亡何麟仲自京以書走湘抵某曰卿孫不
天生而二十有五年而先妣即世又五年先人棄其孤露

濡霜降於今二十有五年祿養弗可及也欲報之德罔極
奈何今不肖孤藉先人之教有位于朝乃去秋九月天子
有事於明堂推錫類恩我先考妣實該初贈惟先世之志
行事治未有以詔子孫傳無窮敢稽顙下拜以請某發書
愴然念所見聞不謬因不果辭乃撫御史君所撰行述而
書之徐氏祖伯翳宗偃王偃王子孫散處徐楊二州間江
右之徐以南州高士重其後沂豫章而上今家清江縣崇
學鄉之檀溪溪莊公諱森字壽叔曾祖諱徹祖諱源皆隱
而能詩考諱大經桂山謝公題其所居曰溪雲小隱里人
因稱爲溪雲先生溪雲性嚴介家人嗃嗃然好客車轍滿

門溪莊天分寬平春和玉溫撰杖屨侍琴瑟書冊左右色
養無違族居千指融融怡怡無一間言少游鄉校文聲籍
甚嘉定丙子待試成均繼以詞賦爲郡諸生第一士論翕
然中年幹蠱用譽晚謝塲屋益雅淡謙謹疏戚一致未嘗
言人過失其尊尊親親賢賢老老幼幼無不得其歡故鄉
里遠近一以吉德厚善歸之而徐爲德門矣淳祐壬子得
末疾越五年歿實寶祐丙辰十二月三日也享年六十有
七妃熊氏豐城著姓既歸奉尊章相夫子主饋治家延師
教子賓嘉喪祭常黽勉有亡間必如禮乃止有昔人剪髻
斷機風子男二穉孫先七年卒女二適黃一鸚鄭一夔孫

男三屋震必茂震亦早卒女二曾孫男二以開慶己未十
二月奉二柩合葬于所居之西園嗚呼家之將興非必其
先世有竒節異事足以聳動流俗耳目也風流篤厚之意
多孝友睦婣之味長君子長者之澤有餘而不盡所謂有
是父有是子或曰非此母不生此子者非偶然也徐氏之
澤始基於溪雲浸大於溪莊今御史君玉立山峙川增日
起由邑最結主知歲中三遷遂陟臺端爲國綱紀駸駸且
大任少頃暇之隴岡之阡何患不表顧墓上之刻不鄙以
余屬余其敢不銘諸以昭徐氏德盛流光之懿以對揚天
子之休命銘曰 江西徐宗宗處士介臨洪間蓋其徙檀

溪源委深且長溪雲爲父溪莊子溪莊恂恂允誠篤溫兮
如玉天鍾美融爲瑞芝溢爲醴積慶綿綿開御史朝爲卓
魯暮汲魏公朝旌擢清風起西阡雖舊命則新我銘宰上
村可梓立身揚顯殊未已木杪龜趺此其始

蕭明允墓誌銘

君初名堅字子固後改應新字明允廬陵珠川人廬陵故
多蕭氏而珠川亦望族君拔起其間自幼岐嶷長益嶄絕
種績文學頌頌與逢掖爭鳴三赴天子學銳不少衰氣岸
孤聳與人棘棘不阿號其讀書室曰介林嘗謂吾幸守先
人廬弗克規拓是不肯堂構樓其前曰逼雲復出其旁相

我攸宇通之爲園花竹橫從朋賓嘯歌脩然有物表之趣
會予釣遊荒閑位置水石君時一造沛然若自得予以是
知君所自負翹如也咸淳二年十二月九日以疾終年四
十六曾祖炳文祖國老父景伯妣李氏繼母曾氏妃劉氏
男曰宋翁女曰淑慧淑慈淑懿皆幼卜以四年正月八日
歸于淳化鄉王田雙園之原前期其弟至與其孤造門以
銘請銘曰 嗟予介林兮孑孑而無成大輿之壯兮羗中
道而折衡意衣冠之雖葬兮不能葬其英英瞻雲山之莽
蒼兮尚骯髒之如生

觀察支使蕭從事墓誌

文山全集 卷之九
德安府觀察支使蕭君安中中大夫江南西路安撫副使
兼知吉州諱逢辰第二子撫使公發聞顯庸克開厥家於
時爲鉅人長德自其宗族鄰里鄉黨待公而舉火者百數
十家咸淳四年六月不幸公捐館君於是年四十有五矣
持抱孤姪臨喪如不勝至經紀其家上下調娛是似是續
罔有越厥度哭撫使公者繼于門哭已則私相語曰我公
未遽亡乎迄服除如其初邦人士莫不嘉君之志而嗟嘆
感發以爲撫使公之有子云君字和仲號介軒儼然端重
人也喜讀書爲文辭倜儻有才氣在膝下幹蠱服勤左右
無違及論世事有奮然自樹立事功之意咸淳十二年領

江西漕舉寶祐二年以恩授登仕郎後三年銓試第一授
脩職郎袁州宜春縣主簿開慶元年以撫使公無鄉郡奏
充書寫機宜文字明年改注壽昌軍武昌縣主簿景定五
年取舉江西漕咸淳改元循從事郎授支使自呂武公以
下舉閔陞三員親民四員六年十月以疾卒于正寢乃卜
葬於永豐百蛟之原朝奉郎文天祥以其子元永哭請銘
爲之銘語曰三年無改於父之道可謂孝矣嗚呼蕭君克
蹈聖言雖不得祿與不得年見於先人無忝爾生有子有
孫以莫不承

樂語

宴交代寧國孟知府致語

粉省望郎來向雙溪領牧玉堂學士將從五馬歸班文章
太守兩風流新舊使君同意氣三生結習千里逢迎筮吉
日以交龜秩初筵而式燕共惟某官一中體段萬卷工夫
風來湖面月到天心眼小衡峰勘破是間造化胸吞震澤
充開裏許規模靜觀時仁意無邊自得處生香不斷那許
山房獨樂便須朝步高騫淡月踈星繞建章步凌紫界燕
寢清香森畫戟駕熟朱轡東遊方喜於行春西嚮又歌於
來暮好是當年孟夫子肯爲今日謝宣城况也江雲鄰哉
雩水鳳凰飛下又傳岳牧得詞人熊軾馳來重見神仙遊

碧落少遲表選即看中環我判府報政趨朝及時受代子
孫未好非徒契結金蘭賓主相歡要是味同草木說賣劍
買牛故事誦無襦有勝新誼真成宮羽相宣正好豆籩有
踐地衣綉毯風袖瑤琴海棠開後燕子來時猶自青春未
減楊柳舞低桃花歌徹莫令紅影空搖且從容東野雲龍
更領會醉翁山水陽坡瓜好此番贖講齊盟西掖花香他
日重尋舊約某等四工樂部執藝台堦上奉清歡下陳俚語
玉堂學士催班鷺粉省潛郎趣佩麟來往神仙同碧
落後先岳牧總詞人陽坡共喜瓜時及朝路相期柳
色新握手論文拚一醉東風散作滿城春

宴交代湖南提刑李運使致語

錦帳尚書郎手持金節綉衣直指使面授銀龜二十年虎
榜同盟第一段熊湘佳話豆籩初秩英蕩增輝某宮紫微
垣裏星辰大華峰頭霜雪黃簾綠幕閉朱戶天子門生冰
壺玉衡懸清秋神仙人物插天高雲霄闕拔地起湖海樓
湧翠浪流玉虹璽書濕濕拊翠濤拍青壁琴轡垂垂依然
彈壓舊江山總是快活新條貫綸巾羽扇便追赤壁功名
流馬木牛要做中原事業了却燕然山勒石歸來文德殿
宣麻我提刑同看長安花新聽衡陽鴈茅舍竹籬玉堂金
馬到處無心青天白日芝草鳳凰舊時相識自是平生管

鮑合成一會蕭曹共讀禮樂字三千好吞雲夢澤八九瀟
湘雨煙寺鍾洞庭月遙看八面玲瓏蓬萊盞金蕉葉海山
螺散作九州歡喜某等叨居伶部幸際華筵欲助歡顏敢

陳韻語

河漢雙星會使槎分明徹夜照長沙轡絲曉轉金龜
影衣綉春隨錦鵲花雲杏舊陰浮綠淨野萍新韻度
朱華明年共侍蓬萊宴回首丹墀日未斜

宴朱衡守致語

粉省郎星來坐朱陵堂上綉衣公子相逢紫蓋雲邊麾節
同春豆籩永夕某官寶劍雙峰意氣錦機五色文章北斗

丹梯我玉皇香案吏西方雲界公佛地位中人旗蓋東西
雲龍上下羅軒冕朝天闕秉刀尺贊仙臺荒政七州秘閣
常平再見勝游三峽吏部刺史重來移太薇垣二十五星
照祝融峰九千餘丈朝樹夜濤入詠汀蘭岸芷生香染麻
深燕雀成須信陰崖轉暖虎豹遠蛟龍遁從今後戶無塵
袴袴歌春脚方新絲綸閣天風又下我提刑交情四海王
事一家石鼓話頭謾對芳洲杜若玉堂何意要歸茅屋梅
花一堂聚會天人千里逢迎地主細話巴山雨共酌古鄜春
好將席上歡聲散作人間和氣鮮鯽銀絲香芹碧澗小對
歌筵宮花玉仗御水金罍再同催宣宴敬陳古語聊贊歡顏

翩翩紫馬絢銀潢春入梅花新雨香牛斗劍芒浮翼
軫岷峨佩影度瀟湘東南麾節精神合上下風雲意
氣長且爲綠鄴拚一醉傳呼聯轡覲明光

宴湖南董提舉致語

前知
瑞州

碧落使君來坐皇華堂上綉衣公子相逢紫蓋雲邊二十
年虎榜同盟第一段熊湘佳話招呼風月酌獻豆籩共惟
某官精神綠水天河節操丹崖鐵筆一椿獨老霜皮溜雨
黛色叅天雙萼齊芳紅杏倚雲碧桃和露插天高雲霄闕
拔地起湖海樓心白玉堂肘黃金印劍池丹井提携翠越
風流天柱祝融脫活青雲標格盡道常平老子移來上界

神仙英蕩照空霜飛暑路鋒車度曉煙傍袞衣我提刑同
看長安花共聽衡陽鴈風雲一氣朱結綬貢彈冠車馬同
途翰卜隣邕識面霄漢瞻佳士瀟湘逢故人共談禮樂字
三千好吞雲夢澤八九度斗牛跨麟鶴襟期交注樽壘縹
鸞鳳拏虎螭勲業同刊彝鼎其等叨居伶部聊獻工歌

西風八月楚江濱爭看星槎會漢津露濕紅綾旗影
舊雲連翠蕩轡華新東西杜若洲連月先後瑞芝堂
上春回首瓊林拚一醉仗還總是鳳池人

宴交代權贛州孫提刑致語

太守奉親歡迎綵鷁使臣領牧新收銀菟班行兩度襟期

臺郡百年交好豆籩酌獻金石綢繆其官一襟禹穴米霜
萬丈剡溪玉雪淡墨慈恩塔光射斗牛妙音蓬萊宮清諧
韶鳳入領園橋冠帶出聽湓浦琵琶捫左角歷天田記方
流䟽玉水旌旗日暖下太微垣裏星辰鼓角雲和種干越
亭前花木襦袴方歌夜雨幃帷又轉春風白馬金盤陀摩
娑韞石三百里玉節青絲纜約束江城十一州金池與玉
節相輝綉斧共朱轡出色崆山絕處移來琴鶴高寒廉水
光中洗出劍刀清淨岩開曉日灘蟄晴雷小駐英函歌虹
流吟翠浪快持荷橐飛鳳尾來虎頭我判府勇撤楚車新
依冀部白雲舍近移來簾綉輿藤先月臺高記得朝花院

柳喚起十年膠漆盡歸一日樽壘麾節同春笙歌未夕海
山螺金蕉葉散爲八境和風禁苑鳳青瑣闈行共九天清
露某等叨居伶部敢獻俚歌

麾節東南會一堂蘭亭昨日記流觴六絲星度銀潢
影五綵春浮玉翠香院柳舊雲懷燕語野草新雨挹
虹光鳳池對秉他年事佇看天街接佩璫

又宴前人致語

粉省望郎綉衣弭節碧山學士綵袖分符好看翠浪乘虹
重酌廉泉飛雪某官函關老子姑射仙人金鍾冰壺玉衡
精神流麗青天鳳凰芝草表裏光明昔爲天子好則生今

是玉皇香案吏移下半空冰鏡清照鄱湖鎔成萬疊冰花
春浮贛石澄江分一道老氣橫九州明弼堂中快活條貫
籌思樓外遠天規模發揮清獻江山張主濂溪風月人行
曉日吏立秋霜使節上青霄有華冠蓋吏部提英鑒佇入
鈞樞我判府金石交情填箠王事上堂拜家慶方報行春
知府見監司來依先子更醉燈前花雨共游雪外煙林肯
爲二千石徘徊散作十一州歡喜鮮鯽銀絲香芹碧澗小
對歌筵宮花玉仗御水金溝同催春宴某等敢陳吉語上
贊台顏

簾影晴絲落舞茵崆峒雲晚聚星辰翠虹光度樓臺

月香燕先浮霄漢春一道清風華轡遠雙江綠水綵
衣新相逢屢有朝花約又看貂蟬會紫宸

上梁文

山中堂屋上梁文

戴符尋隱久矣買山潘岳奉親昉茲築室未說胸中之全
屋姑營面北之一堂凡私計之綢繆皆上恩之旁薄自昔
園林臺館之勝難乎溪山泉石之全瑯琊兩峰似太行之
盤谷建陽九曲類武夷之桃源然而有窈而深者無曠而
夷有清而厲者無雄而峭所在罕并於四美其間各擅於
一長而况索之於杖屨之餘去人遠甚未有納之於戶庭

之近奉親居之主人白髮垂闥綵衣四世出隨園鶴竹軒
晃於何心歸對林鳥覺簾瓢之有味頃闢上游之叢翳偶
逢小隱之坡陀江村八九家得重洲小溪澄潭淺渚之勝
山行六七里有詭石恠木竒卉美箭之饒攀飛雪而窺空
徑度脩蕪而陟穹巘雲奔虎鬪根穴相呀斗折蛇行嵒巖
差互看輞川畫如登南垞過華子岡讀黃溪詩如上西山
至袁家渚其遐詭足以騁懷而遊目其深靚足以養道而
棲真自天作之非人力也未爲仙翁釋子之所物色惟有
樵童牧豎之相往來偶然幻出種竹齋見山堂尚欲敞爲
拂雲亭澄虛閣先生酒壺釣具無日不來夫人步輿輕軒

有時而至乃若波濤洶歛雪月紛披烟雨吐吞虹霞變現
將使山間四時之樂盡爲堂上百歲之娛啜菽水盡其歡
先廬固在得諼草植之背別墅何妨乃相南隅乃規中奧
有護田一水排闥兩山之勢得栽芋百區種魚千里之基
問之陰陽天與我時地與我所若有神物水增而廣山增
而高不管相如四壁之蕭條且作樂天三間之瀟灑窓中
列岫庭際俯林舍北生雲籬東出日或積土室編蓬戶或
通竹溜縛柴門宛然林壑坻島之中更有花木樓臺之意
眼前突兀見此屋人生富貴何須時苟美苟完爰居爰處
謳吟月露供燕喜之詩判斷煙霞博平反之笑何必瑤池

崑崙閩風玄圃方是神仙不須終南太華天台赤城亦云
山水被禍而環堵卻軌而杜門彈琴以詠先生之風高卧
自謂羲皇之上不知老將至聊復得此生今日幽居便可
號爲秘書外監他年全宅亦無華於昌黎先生小住郢斤
齊聽巴唱

東 紅日照我茅屋東繞盡湖陰橋上看世間無水
不流東

南 說與山人住水南江上梅花都自好莫分枝北
與枝南

西 隄東千頃到隄西往來各任行人意湖水東流

文山全集 卷之九
江水西

北 濁酒一杯北窓北白雲去住總何心或在山南

或山北

上 莫道青山在屋上青山一疊又青山有錢連屋

青山上

下 試看流水在屋下他時戲綵畫堂前福祿來崇

更來下

伏願上梁之後千山歡喜萬竹平安舉壽觴和慈顏兒童
稚齒昆弟斑白濯清泉坐茂木虎豹遠迹蛟龍遁藏陰陽
調而風雨時神祇安而祖考樂一新門戶永鎮江山

山中廳屋上梁文

舍一畝之白雲已開別業屋四圍之流水更啓前榮發揮
已定之規模展拓方來之閎闊有相之道迺績于成主人
未了書癡頗有山癖先人之敝廬在苟安風雨之餘慈母
以輕軒來亦愛園林之近頃斲蒼苔之地昉營護草之堂
雖環堵之間粗云具醜然闔廬之制未畢全功相協厥居
聿來胥宇階祀所以行僎佺屏著所以肅賓嘉不日成之
以時可矣是用戒良梓筮吉辰弗蚘繆於水端架蛻螿於
雲表然後翼之以廡承之以門移石而立庭臯通泉而周
戶外清湍峻嶺爲不斷之藩垣野草幽花作自然之丹雘

老之將至訖可小休昔晦翁愛武夷而不能家歐公卜顛
水而非吾土余何爲者乃幸得之未問君王便比賜鑑湖
之宅何須將相方謀歸綠野之堂凡與同工齊聽善頌

東

日光穿竹翠玲瓏坡茅屋柴門在半峰荆風袂

欲挹浮丘翁谷

南

水面沙邊綠正涵荆道人爲作小蒲庵坡山上

仙風舞檜杉坡

西

雨過橫塘水滿隄豐漁簑背雨向前溪荆水聲

秋碎入簾幃豐

北

澄碧泓渟涵玉色歐夜深山月吐半壁谷誰來

共枕溪中石

坡

上

亂峰深處開方丈

歐

風雨戶牖當塞向

谷

五更

曉色來書幌

坡

下

門前白練長江瀉

坡

鼓吹却入農桑社

坡

翠浪

舞翻紅糴程

坡

伏願上梁之後山輝川媚神比天同俾耆俾艾俾熾俾昌壽
毋多社爰居爰處爰笑爰語君子攸寧自此定居永為安宅

代曾衢教秀峰上梁文

居香城初任衢教日未新
歐陽楚方自其邑買見屋

除拆浮
江而來

兒郎偉香城拔地為廬陵之名山大廈連雲新廣文之甲

第結廬在人境幽居近物情竊以買宅買鄰元號千百萬
之價有廬有屋或待三十年之勤未有不崇朝之間而能
使二美之具誰爲之地乃有此竒一片乾坤澹菴先生之
里隔牆鍾鼎文昌兄弟之家况方其何蕃之在齊已有爲
戴公而起宅至今日歸之斯受亦有數行乎其間川浮陸
運以無遺水到渠成而甚易移彼置此換舊添新疑半天
之飛來忽平地而卓起尋引繩墨規矩曰用舊人丹牖塗
墜垣墉特其餘事多助之至不日而成彼有室築而道謀
此則事半而功倍我府博才高一柱胸洞八窓大學館中
飛黃騰去大成殿下釋褐歸來安能鬱鬱居乎是以汲汲

如也向時茶壘曾寫千萬間之心此日規模硬作十二樓
之樣由柯山而徑上遡木天而橫飛何官不爲餘地甚綽
青山如許聊且號工部草堂綠野後來以此爲大祝廳事
輒陳韻語共舉脩梁

東 穹秀崢嶸華蓋峰卓筆雲霄天下獨曹劉班馬
避詩鋒

南 翡翠英中碧玉簪一抹呆愚生畫色府中氣象
已潭潭

西 鄰有文昌瑞色齊乃祖紹興光價在重噓真氣
磔鯨鯢

北 山腰帶曳清江曲滄江歷歷現雙魚彷彿黃金

繫橫玉

上 一朵紅雲只尋丈瓊樓高處不勝寒鞦韆乾坤

凌萬象

下 不是求田并問舍要令突兀在眼前俯拾八荒

歸廣廈

伏願上梁之後闕闕增高室家嚮用堂前龜鶴親見金挑
天上麒麟聯輝玉樹大耐官職自立門庭以無媿於前脩
用求傳於佳話

宋丞相文山先生全集卷之九終